


生、如有足無目不知所從。三事理雙運、目足相資、萬行圓修、必至彼岸。四理事俱昧、盲而無足、愚癡惰慢、終無出期。是知理事各立、未免偏邪。空有一如是真修習。故曰、實際理地不受一塵、佛事門中不捨一法。諸佛菩薩歷劫熏修、華竺祖師終身苦行。此理深密、何可盡言。略示大途、粗分緇素耳。」見業疏記 卷二十二

資持云：『今時愚者、錯解佛乘。皆謂理觀寂爾無思、空然無境。取捨不得、能所俱亡。頑然寂住便是真如、放蕩任情。即為妙用。由是不禮聖像、不讀真經。毀戒破齋、嗜酒噉肉。誇為大道、傳化於人。惡業相投、率多承習。此乃虛妄。臆度顛倒論迴。豈知達法皆真。何妨泯淨了真。即用豈礙修行。是知悟理則萬行齊修、涉事則一毫不立。自非通鑒餘復何言。』見事鈔記 卷二十八

上來別明化教二懺中第一章對顯二懺竟

## 第二章 重廣理懺

重廣理懺中分為三節



### 第一節 標示用心

▲事鈔云『言理懺者。既在智人、則多方便。隨所施為、恆觀無性。以無性故、妄我無託。事非我生、罪福無主。分見分思、分除分滅。如人醒覺、則不眠醉。』

資持釋云『初示所修觀相。無性即空理。以下明

罪滅所以諸世間業皆從我生我為業主我既無託故所造善惡不從我倒而生妄業無依故得除滅見謂達理思謂起修除謂能觀智滅即所觀業破妄顯真而非頓證故皆云分若約位判分見分思即內凡人分除分滅即初果已去如下喻顯眠醉喻迷醒覺喻悟眠覺醉醒相似法故』

見事鈔記  
卷二十八

## 第二節 別列三觀

▲事鈔云『然理大要不出三種』資持釋云『理本是一、何有三者。若權實往分、前二是權、後一是實。若大小相對、前一是小、後二屬大。若約開權會小、終歸一理。若對三宗、性空局小、唯識局大、相空通小、大如是分之。』

△事鈔續云『一者諸法 性空無我。此理照心、名為小乘。』資持釋云『性空中分三、初示所觀境即諸法二字。諸法之言總包一切。諸經論中或約依正因果、或世出世間、或有漏無漏、或色心非色心、或善惡無記、或陰界入等。若據通論總觀諸法、今就懺悔且指罪業而為觀境。性空無我一句即能觀智。罪從緣有、本無自性緣即心境。虛妄心境和合成業。業性自空、非使之空。由存妄計故受輪轉、但破妄計覓罪。叵得、叵得之處。強名空理。言性空者小機智劣、不能即法見空。必待推析、窮法體性、然後方空。此下判位。小乘通收聲聞緣覺。據所乘法諦緣雖殊、若論斷證同見空理。』

△事鈔續云『二者諸法 本相是空、唯情妄見。此理照用、屬小菩薩。』資持釋云『相空中亦三、示境同前。能觀中言相空者了法無相。猶如幻化味者謂真、亦如空華眼病謂實。故云唯情妄見。判位中小菩薩者雖發大心、未窮心本、故設此觀空諸塵境、如諸般若所被初心。言照用者二乘住寂故但照心、

菩薩涉事故云照用。若對三宗即當四分同觀空理故云小也志慕佛乘故云菩薩』

△事鈔續云『三者諸法 外塵本無實唯有識。此理深妙唯意緣知是大菩薩佛果證行。故攝論云唯識通四位等』 資持釋云『唯識中三科同上觀境可解。能觀中外塵謂一切境界也言本無者有

二義一者境即心故二者虛妄見故實唯有識者言唯則遮於外境言識則表於內心。判位中上二句彰

勝對前粗淺故云深妙。次二句正判大菩薩者初地已去也。故下引證彼以五十二位總為四位論云一切

法以識為相真如為境。境即是體依此境界隨心信樂入信樂位。此收加行十信十住十行十迴向四十位如理通達得入見位。即初地也能對

治一切障得入修位。二地至七地出離障垢得入究竟位。八地至佛地初位所修名影像唯識後三所修名真唯識。有人將前小菩薩對加行者不知觀行不同也問有人云唯識觀南山判位太高又云深位無罪豈須懺悔其意云何答論文自云唯識通

四位那責南山判耶。此蓋特舉深位以彰理妙當知悔法正為下凡故下勸令任智強弱隨事觀緣豈令果佛而悔罪耶。前修率爾不無小疵後進狂簡便生輕謗寄言有識詳而慎之。已上皆見事鈔記卷二十八

### 第三節 結示

▲事鈔云『以此三理任智強弱隨事觀緣無罪不遣』 資持釋云『據理深淺由機強弱當量已分

隨力修之。然末世情昏鮮逢利器尚未堪於事行況克意於玄門三觀微言於茲殆絕嗚呼』見事鈔記卷二十八

上來別明化教二懺中第二章重廣理懺竟

上來懺悔篇中第二門別明化教二懺竟

上來第三懺悔篇竟